

Bajazit Jašarević, direktor "Elektroprivrede BiH" (EPBiH), izjavio je za "Dnevni avaz" da je izgradnja Bloka 7 TE "Tuzla", vrijednog 667,8 mil EUR, koji bi se finansirao novcem Razvojne banke Kine, u zastoju, a smanjen je i obim investicija u ovom bloku.

On je pojasnio da za Federaciju, ali i EPBiH u ovom poslu postoji ogroman valutni rizik s obzirom na postojeći potpisani ugovor s Kinezima, tačnije konzorcijem "Gezhouba Group Company Limited" (CGGC), koji je na tenderu dobio ovaj posao.

- Imamo poteškoće jer je kredit u dolarima, a ugovor koji imamo u eurima. Zbog valutnog rizika za sada nemamo mogućnost da ovaj projekt krene dalje - kaže Jašarević.

Ocijenio je da svaka strana, bosanskohercegovačka i kineska, traži rješenje za ovaj dio problema.

- Tražimo rješenje kako da se osiguramo od valutnog rizika, a to znači da se zbog teško predvidivih odnosa dolara i eura na finansijskom tržištu rizik povećao i trenutno smo u zastoju u pregovorima. Ovo je jedno vrlo složeno pitanje - ističe Jašarević.

Jašarević tvrdi da će oprema, kada je u pitanju izgradnja, biti evropska, ali da će investicija biti umanjena za 63 mil EUR.

- Do smanjenja obima investicija je došlo jer dio postojećih postrojenja u TE "Tuzla" koristimo za Blok 7 i to je smanjenje za sada od 63 mil EUR. To znači da će biti manja investicija, ali će biti i manji kredit. No, sve će se još vidjeti - smatra Jašarević.

Blok 7, koji bi se trebao graditi, imao bi snagu od 450 megavata. Ukoliko se ne izgradi na vrijeme, snaga struje koju će imati TE "Tuzla" je 215 megavata, što znači da će Federacija imati malu količinu struje za potrošače.

izvor: indikator.ba